



Múte Bourup Egede  
Inatsisartunut ilaasortaq,

**Naalakkersuisut Brexitimut tunngatillugu Tuluit Nunaannik isumaqatiginninniarlutik oqaloqateqarnerat pillugu § 37 naapertorlugu apeqqutip nr. 041-2019-ip akineqarnera**

29-01-2019  
Suliap nr. 2019 - 2673  
Postboks 1340  
3900 Nuuk  
Oqarasuaat (+299) 34 50 00  
Naqitanik nassitsigasuaat +299  
32 93 98  
E-mail: nap@nanoq.gl  
www.naalakkersuisut.gl

Inatsisartut suleriaasianni § 37, imm. 1 naapertorlugu Brexitimut tunngatillugu Naalakkersuisut Tuluit Nunaannik isumaqatiginninniarlutik oqaloqateqarnerinut tunngatillugu Naalakkersuisunut apeqquteqarsimavutit. Apeqqutigineqartut uannut akisassanngortinneqarsimapput:

**Naalakkersuisunut apeqqut:**

**1. Naalakkersuisut Brexitimut atatillugu niuernikkut allatigullu suleqatigiiffiusinnaasunik Tuluit Nunaannik isumaqatiginninniarlutik oqaloqatiginninnerat sumut killippa?**

**Akissut:**

Siullermik Savalimmiormiut pillugit, Savalimmiut apeqqutit tunngavilersuutaani taaneqarmata. Savalimmiormiut Nunatsinnut sanilliullugu EU-mut Tuluit Nunaannullu allanik niuernermik sinaakkuteqarpoq. Savalimmiormiut EU-llu tigussaasumik niuernermik isumaqatigiissuteqarput, niuernermut killeqartumik, taannalu Brexitip kingorna toqqaannartumik naleqqussariarlugu aamma Tuluit Nunaannut atuutilertussaassaaq. Tuluit Nunaallu isumaqatigiissummi niuernermut killilersuinerit suli annertunerussapput, imaalertussaagami Savalimmiormiut nioqqutinut aalajangersimasunut EU-mut tunisassiarisartagai Brexitip kingorna taamaallaat 14%-ii ataallugu Tuluit Nunaannut tunisassiarisarsinnaassavai, kingornalu nioqqutigineqartut amerlanerussappata akitsuuserneqassapput.

Tuluit Nunaat taamaalilluni "roll-over"-imik, tassa Savalimmiormiut EU-mut massakkut isumaqatigiissutaanik tuluit inatsisaannut nuussissaaq, kisianni niuerneq killilersorlugu.

Kalaallit Nunaat EU-llu tigussaasumik niuernermik isumaqatigiissuteqanngillat. Niuernermik sinaakkutit EU-mi inatsisit assiginngitsut tunngavigalugit inisseqqapput EU-llu aalisartui naammaginantumik Nunatta imartaani aalisariartarsinnaanerit aamma apeqqutaataalluni tunngaviuvoq.

Nunarput EU-mut Tuluit Nunaannullu niuernerani nioqputit annertussusaat killilersorneqanngillat. Tamakku peqputigalugit ajornaatsuinnaanngilaq Kalaallit Nunaata EU-llu niuernermit sinnaakkutaat, toqqaannartumik Tuluit Nunaannut atuutilernissaat, niuernermit sinaakkutit Kalaallit Nunaannut ammanerummata, aalisakkanik pisassiissutit ilanngunneqarnikuugamik, ataatsimoortumillu isumaqatigiissummik tunngaviusinnaasumik peqannginnami.

Tuluit Nunaata aamma Kalaallit Nunaata akornanni atorfilittatigut ataatsimiinnerit aallartiffiusussat aallartissimanerat killiffiuvoq. Tuluit Nunaata massakkorpiaq EU-mut ilaammat, tamannalu pissutigalugu Kalaallit Nunaannik isumaqatigiinniarnissanut taamaattunut piareersimanngimmat niuernerup tungaatigut isumaqatigiinniarnissaviit aallartinneqarsinnaanngillat. Taamaattoq Kalaallit Nunaata kissaatini erseqqissaatigiussavai, Tuluillu Nunaannik attaveqaatitit ingerlatiinnarlugillu ineriartortittuassallugit. Taaneqarsinnaavoq Department for Environment, Food and Rural Affairs (DEFRA) ministeeriaqarfik avatangiisinut, nerisassalerinermut nunaannarmilu illoqarfinnut akisussaasumik aalisarnermullu aamma akisussaasumik ataatsimeeqateqarsimapput. DEFRA Kalaallit Nunaannik attaveqarnerulernissamik soqutigisaqarpoq, tamatumunngalu Tuluit Nunaata Atlantikup Avannarpassissuani aalisakkanut naalagaaffittut sinerialittut taaneqarsinnaalernissamik ilimasunera pissutaavoq. Kalaallit Nunaata EU-mik aalisarneq pillugu isumaqatigiissuteqarnera pissutigalugu Tuluit Nunaat kalaallit imartaanni saarullinnut aamma pisassinneqartarpoq.

Kalaallit tungaanniit Tuluit Nunaata aamma Kalaallit Nunaata akornanni niuernikkut pissutsit, Brexitip kingornagut niuernikkut tunngavigisassat nutaat aamma aalisarneq pillugit ilisimatitsisoqarpoq aamma Kalaallit Nunaanni Issittumilu ineriartornerit piukkunnaatillu pillugit ataatsimut ilisimatitsisoqarluni. Tuluit Nunaat Brexitip killiffia aamma Brexitimut tunngatillugu pissutsit suli paasineqanngitsut pillugit ilisimatitsivoq, nalunaarutigalugulu Tuluit Nunaat niuernikkut isumaqatigiissutissanut suli isumaqatiginninniarnissanut piareersimanngitsoq. Attaveqaatilli kalaallit tungaanniit ingerlatiinnarneqassapput, matumani tuluit nunaanni ministeeriaqarfiit attuumassutillit Kalaallit Nunaannik ilisimasaqarnerat annertusaqqullugu.

## **2. Naalakkersuisut nunatta Tuluit Nunaannik niueqatigiinnissamut isumaqatigiissuteqarfiginissaanik suliaqarpa?**

### **Akissutit:**

Naamik, Kalaallit Nunaata Tuluillu Nunaata akornanni niuernerup pillugu isumaqatigiissutissamut missingiummik Naalakkersuisut suliaqarlutik suli aallartitsinngillat, apeqqut 1 –ut akissut takuuk. Suliap aallartinginnerani pissutsit assigiinngitsut utaqeqqaartariaqarsimapput, soorlu EU-p Tuluillu Nunaata akornanni pissutsit attuumassuteqarsinnaasut kiisalu Tuluit Nunaata (Department of International Trade) DIT-ianiit tusarliinerit aallarniutaasussat.

Aammattaaq niuernikkut qanoq ittumik isumaqatigiissusiortoqassanersoq apeqqutaaleqqavoq, tassami isumaqatigiissutini assigiinngitsuni

pitsaaquteqarlunilu ajoqutissaqartarmat. Nalunanngilaq kalaallit tungaannit isumaqatigiissut niuernikkut killilersuivallaanngitsoq soqutiginarnerpaajussasoq. Aammattaarli Tuluit Nunaata aamma Kalaallit Nunaata akornanni isumaqatigiinniarnerni Kalaallit Nunaata isummerfigisassaanik Tuluit Nunaata tungaaniit allanik piumasaqartoqariaannaanera ilisimasariaqarpoq.

Inussiarnersumik inuulluaqqusillunga



Ane Lone Bagger